

բայց միացնում է իր ամբողջ հողամասը: Ժողովուրդը սիրում է իր երիտասարդ Հանրապետութիւնը. նրա մէջ արմատացել է անկախութեան դադափարը. նա երբեք չի բաժանւի նրանից և երբեք չի զիջի: Ճիշտ է, մեր առջև, Տաճկահասցաստանի փակ դռների յետև, մեր թշնամին շարունակում է կատարել իր մութ գործերը և ինտրիգներ է սերմանում այս կողմը, մեր Հանրապետութեան սահմաններում: Բայց ես չեմ կասկածում, որ մենք կը ձեռքենք այդ դուռը մեր մեծ դաշնակիցների հետ միասին, կը տիրենք մեր երկրին, որ ցողած է անհամար մարտիրոսների և հերոսների արիւնով: Հայ ժողովրդի արեան դատը, անկասկած, պէտք է ստանայ իր նպաստաւոր և արդար լուծումը. այդ դատը մարդկութեան խղճի, պատւի և իրաւունքների դատն է, մարդկային գոյութեան հարցն է, որ ոչ ոք չի կարող ժխտել... Երջանիկ և ողւորւած եմ ողջունելու մեր առաջին ընտրւած Խորհրդարանը այս պատմական վայրկեանին»:

Ապա ողջունեց դաշնակիցներին ու հարևան պետութիւններին, յանձին նրանց ներկայացուցիչների, և «մեր փառապանծ բանակը, որ հայրենասիրութեան անսահման անձնագոհութեամբ կուռն է՝ պաշտպանելով մեր հայրենիքը արտաքին և ներքին թշնամիներին»: Խորհրդարանը խանդավառ ծափերով ու յոտնկայս ցոյց արաւ հայ զորքին:

Երկրորդ նիստում Խորհրդարանը կազմեց իր նախագահութիւնը: Փարիզից եղած դիմումի վրա, ձեռական նախագահ նշանակեց Ա. Ահարոնեանը, իսկ իրական նախագահներ — փոխ-նախագահներ — ընտրեցին Լ. Շանթը և Ս. Արարատեանը: Քարտուղարներ՝ Յ. Տէր-Յակոբեանը (աւագ) և Ա. Սաֆրաստեանն ու Ա. Տէր-Միքայէլեանը:

Երրորդ նիստում, օդ. 7-ին, 40 քւէով ընդդէմ 8-ի վարչապետ կարգեց Ա. Խատիսեանը: Վերջնականապէս կազմեցին խորհրդարանական 12 յանձնաժողովները, որի մէջ մտան բոլոր պատգամաւորները: Որոշեց Խորհրդարանի նիստերը դումարել շաբաթը երկու անգամ՝ երկուշաբթի և ուրբաթ օրերը:

Չորրորդ նիստում, օդ. 10-ին, Յ. Արղութեանի նախագահութեամբ*), վարչապետը յայտարարեց նոր կառավարութեան անդամների ցանկը — վարչապետ և արտաքին գործոց նախարար՝ Ա. Խատիսեան, ներքին գործոց և արդարադատութեան՝ Ա. Գիւլխանդանեան, պարենաւորման և ելեմտական՝ Ս. Արարատեան, խնամատարութեան և աշխատանքի՝ Ա. Սահակեան, հանրային կրթութեան և արւեստի՝ Ն. Աղբալեան, զինւորական՝ զօր. Բ. Արարատեան: Ցանկը վաւերացեց 37 քւէով 2-ի դէմ, որից յետոյ վարչապետը կարգաց կառավարական յայտարարութիւնը:

Ներկայացնելով Հայաստանի արտաքին ու ներքին քաղաքական բարդ դրութիւնը, թիւրք-ագրէջանեան դաւերը, պարենաւորման ու ելեմտական անկայուն վիճակը, անգլիական զորքերի մեկնումը Կովկասից, հայկական հարցի ընթացքը Հաշտութեան Վեհաժողովում՝ յայտարարութիւնը երկարօրէն կանգ էր առնում կառավարութեան անելիքների և վարելիք քաղաքա-

*) Ս. Արարատեանը նախարար նշանակելով՝ հրաժարւել էր, իսկ Լ. Շանթը դեռ չէր եկել Եւրոպայից: